

四庫全書

集部

欽定四庫全書

明詩綜卷六十七

翰林院檢討朱彝尊編

艾

穆 七首

穆字和甫一字純卿岳州平江人嘉靖中舉人
初仕為國子監助教萬厯初遷刑部主事歷員
外郎抗疏論張居正奪情廷杖遣戍西寧久之
起補光祿少卿轉鴻臚寺卿再轉太僕寺卿以

都察院右僉都御史巡撫四川有終太山人集

靜志居詩話艾公與吾鄉沈純甫先生同論江陵奪情其謫戍一西一南艾公出都詩云病向西風一促裝寥寥征鴈塞雲長流沙萬里無愁遠去國孤蹤信若狂楚客江魚身可葬漢臣馬革骨猶香青山到處皆吾土宜必湘南是故鄉是亦達人之言西竄之後詩律頗效空同自公而後南風多死聲矣

聞有救獲赦不果

十年不向湘江返一疏翻為萬里行隴外儘令魑魅喜日邊應有鳳皇鳴極知故態仍狂瞽須信天王自聖明

閒却綵衣誰為著塞雲邊月不勝情

甘泉塞上呈中丞侯公

青海灣頭調角聲賢王西牧欲橫行塞門縱款猶難測
斥埃無烽却不驚破膽爭傳司馬諭受降高築白狼城
腐儒未識麒麟画只道風塵易請纓

奉和岳州張兵備

握蘭虎署為郎日意氣相看獨有君擊節幾談天下事
建旄今領水犀軍幕中說劍雙龍動樓上停雲七澤分

秋色滿湖吟眺足銀魚何苦碧山焚

寄呈乾菴馬公拜相

繡裳蒼玉自丹霄風采今看表百僚帝謂山龍惟爾補
人期霖雨幾時調鳳池魚藻歡應合鴈塞狼烟燼盡消
流落扶風門下士玉關猶得比班超

別羅孝廉

江城傾蓋識清狂意氣翩然調更長歌罷竹枝空下里
賦成雲雨滿高唐蜀門秋盡啼猿急涪渚霜清白鴈翔

後夜思君出巫峽楚山巴月共蒼蒼

寄懷沈純甫戊金沙

衡陽那見鴈飛回庾嶺梅花幾度開
謫後沈郎應更瘦調同楚客不勝哀
金沙潮落珠光動銅柱風清海月來
君在瘴鄉偏逸興新詩能為故人裁

遼東大捷進橐駝志喜

年來渤海不揚波忽聽遼陽奏凱歌
白羽飛傳三箭捷赤囊馳獻獨峰駝
將軍絕勝嫖姚勇良馬何論大宛多

此日天聲應萬里合標銅柱白狼河

瞿汝稷 一首

汝稷字元立常熟人景淳子承父蔭由五府屬
歷郎署知黃州邵武辰州三府遷長蘆都轉運

使加太僕少卿致仕有問卿集

曹能始云問卿詩沿選體律絕

步趨唐人
斐然成章

送僧游五臺

欲叩三車輿還過五髻西飛雲先錫住怖鴿覓燈棲金

閣看長在珠林望不迷
天花開處處知與石牀齊

屠本峻一首

本峻字田叔鄞人尚書大山子承蔭官太常寺
典簿歷南禮部郎中出為兩淮運司同知移福
建運使有屠田叔詩草

詩話田叔好詼諧詩多不拘格律晚節歸田愛
客益甚盥鼓蒜果觴客必盡歡守辰州日禁民
殺牛有唐生牒言家貧畜一牛不幸死請鬻其
肉田叔度其偽也判以俸錢買牛葬之幸至乃
生牛因命小吏飯之及解官衣深衣騎馬出門
州父老泣相送牽牛隨其後時人為作辰陽留

積圖年既老好學不倦或曰先生老矣奚自苦
為荅曰吾於書飢以當食渴以當飲久伸以當
枕席愁寂以當鼓吹未嘗苦也因自稱慙先生
亦曰幽叟起生壙于甬上撰狀及末年八十餘
乃卒至今甬東言風
流儒雅輒首及之

燕歌行

登君罍恩藻井之堂坐君龍鬚琥珀之牀贈君五明七
寶之扇酌君紫霞碧玉之漿烹鮮擊肥召吾客秦箏趙
瑟鳴我旁世上浮名亦徒爾安有五侯七貴能文章勸
君無言舌且藏

毛以烽 二首

以烽字允奎吳江人萬厯中舉於鄉歷官慶遠知府進按察副使致仕有審雨齋詩橐

邨居

丘壑偏宜謝幼輿清泉碧篠愛吾廬祇知幽絕堪高枕未解窮愁好著書閒過山僧烹笋蕨倦從野老課菑畲夕陽流水荆扉靜花滿清尊月滿裾

山陰王伯良久滯京師却寄

蛾眉十樣逐時新不是東鄰亦效顰况是浣紗溪上客
那能不憶浣紗人

吳詔相 一首

詔相字廷承宣城人由舉人萬厯初知汝州有
吳汝州集

詩話臨川湯養仍為廷承作傳述其生而不慧
既就塾日記十言縣試令訝其幼謂曰童子豈
外黃兒邪應聲答曰明府比中年令矣令竦然
異之廷承嘗夢紫衣人指點一閭道中松柏蔥
青數里及知汝州果有閭道松林中歎曰命止
此邪因備於治事未秋滿稱病瘖去歸見其母

抱持大哭夫聲疾遂愈丁母憂未終喪而卒
存詩雖無幾近年編續宛雅者竟遺之惜也

同張侍御有光汎舟分韻

桂櫂連朝發松雲卓午陰涼風轉蕭瑟細雨潤衣襟
歌酒狂無奈耕畬思更深晚來餘興在不厭再相尋

費懋謙一首

懋謙字民益鉛山人襲蔭官南京都察院經歷

詩話民益裙屐子弟綽有詩名兼善山水梅竹
青溪社集實首倡之相逢一篇源出繁欽楊方

相逢行別吳中四子

與君相逢處乃在青溪濱何意溪頭柳能令傷客神與
君相逢處乃在邀笛閣何意笛中曲能令心不樂與君
相逢處乃在射堂上何意堂前月勞勞生夢想與君相
逢處乃在冶城宮何意冶中劍飛躍各西東我昔承清
盼君亦憐我姿願以朱絲絃報君青桐枝終日不成縷
對君空自持願以江干菼報君蘭蕙芳終日不成繭對
君空自將願以青玉盃報君金琅玕終日不成琢對君
倚長歎願以錦繡段報君貂襜褕終日不成章對君長

煩紆贈君愛流晷我亦慎區區所貴各努力聚散誰能
無中情既款款徙倚亦何須古人皓首言君諒我不殊

王敬臣

三首

敬臣字以道長洲人參政庭子講學於吳以薦
授國子監博士學者稱少湖先生有俟後編附

詩

詩話博士講學不立異同以躬行為本
詩其餘事務去學壞陳言更難得也

古詩送陳憲副雨泉之任滇南

黃鵠翔四海潛蚪樂泥蟠飛沉各異塗言就性所安公
行越萬里予留守故灘公勵王尊節九折驅無難予舍
令伯誠有懷良未殫俱奮古人心咸思效寸丹臨岐申
贈言睽離何足歎相期慎明德歲晚同金蘭

感興 二首

河伯侈秋水囂囂自矜誇一聞海若言頽然喪其多覆
載會有終百年能幾何營營靡朝夕所得皆塵沙哀哉
復哀哉是不可已邪

月圓還復缺缺矣又重圓圓缺相倚伏造化良自然萬
事皆如此孰能測其端君子通大道曠然釋嬰纏寸心
良已罄付之蒼旻天

莫是龍

六首

是龍字雲卿以字行更字廷韓松江華亭人如
忠子以諸生久次貢入國學有莫廷韓遺橐

唐君

公云廷韓夙成捷悟
不屑為沉深之思

詩話廷韓少謁王道思於閩道思贈以詩云晝
舫夜吟令客駐練裙晝卧有人書然詩篇書法

皆不見出羣
五律稍勝

登潤州城樓

高閣俯城陰
松篁一徑深
晴雲搖海色
夕梵起潮音
古戍關門斷
山程驛道侵
江流無日夜
南望是鄉心

過滕縣

邑傳滕子舊
爵序薛侯先
壤地雖褊小
君臣自井田
禮猶宗國秉
館想上宮
連遺恨
千年事何勞
授楚廬

送俞生之金陵

驅馬向斜日秣陵尋舊游人應草堂在月滿大江流春
燕投新社離鴻失故洲看君留別意不減落花愁

送陸生遊燕

小陸江東俊名先入洛聞猶能藉知己未可怨離羣燕
地春邊雪吳天野外雲翩翩徒羨爾西笑立斜曛

宿河口酒家

笑指停橈處烟荒一水斜邨旗招野客岸火認漁家淡
月微侵幕初潮淺映沙海天應不遠吾欲訪霸槎

贈任城故知

此別何疎濶風烟宛昔游馬頭芳草路柳外木蘭舟
易隔三年夢難期十日留任城今夜月閒殺酒人樓

鄔佐卿一首

佐卿字汝翼丹徒人有纏頭集

西津別妓

立馬江皋問暮潮片帆西上路迢迢人歸碧草離亭遠
賦罷青山夢雨消雲影飄零桃葉渡月華淒斷鳳皇簫

壚頭濁酒春堪醉還訪秦淮舊板橋

寧祖武二首

祖武字仲先吳江人以貢生官肇慶通判有迂公詩草

詩話別駕未晚投簪娛情泉石預營繭室自為之銘號曰迂丘嘗欲買木版以覆塵几思送死棺所必需匠人告以元日往購則木商不計值且有酒果相邀別駕遂以是日就肆飲酒醕果而回銘木以覆几焉題詩云元日治凶具人情良獨難生以覆几塵死伴歸空山亦達人之高致矣別駕詩多率易錄其二首知非真迂者

新安夜泊

芳草綠如此征塗尚未窮
隔江商店火近市酒旗風
人語邨邨異溪聲處處同
不須愁落魄人世總飄蓬

吳江竹枝詞

唐家坊藕太湖瓜消暑
冰肌透碧紗水上納涼何處好
垂虹亭子看荷花

陶允嘉 三首

允嘉字幼美會稽人承父大順廕官鳳陽通判

有澤農吟

詩話幼美體弱然無塵坐之氣符離懷古一篇惜不令淳熙諸君子見之

廣陵詞

桃花新雨後載月出邗溝棗板江南曲筠簾樺子舟飛
飛雙燕子何處覓迷樓

符籙懷古

張都護殺曲端關中將士皆心寒秦丞相殺岳飛萬里
長城一旦隳婁室歡顏烏珠喜小朝廷復何恃長脚太

師吾何尤魏公九原知悔不

高邨謁漢高皇廟

高邨湯沐地下馬獨徘徊落日吹原廟歌風想舊臺新
豐雞犬去故土夢魂來猛士空煩憶韓彭安在哉

黃繼立 一首

繼立字志學江陰人貢入太學官中書舍人

初夏

楊花初點渡頭萍十姊妹花紅滿屏門前忽見漁舟過

風送鷓鴣一陣腥

任山甫

一首

山甫字夢榛休寧人自號五安山人承天府經歷遷德安通判

和費民益韻

萬里事行役經年往復還愁多生白髮病久改朱顏不厭沽新釀長思返舊山因君歎留滯牕外雨潺潺

襲勗

一首

勗字懋卿章丘人以歲貢生官江都訓導轉威
縣教諭再遷開平衛教授有襲懋卿集

詩話懋卿少貧牧羊豕山中手書卷不釋既而
小吏誣其遁租受笞益發憤力學見李中麓以
詞曲名恥之銳意學古
文辭時稱為醇謹君子

立秋

烟雲黯慘仲宣樓荏苒年華逝水流白首鄉山千里外
滿城風雨又新秋

黃時二首

時休寧人縣丞有順堂集

白螺山吳大帝廟

螺山何嵯峨荆江走其下上有紫髯祠祈報滿邨社自
昔割據時炎劉失區夏聿求土宇寧遑恤名號假巴蜀
徵讖符許洛盛戎馬於焉割朱方鼎立足相亞虎既負
其隅龍乃戰于野哀哉爾汝歌誰永霸圖者來游陳我
辭渚蘋薦盈把

孟嘗君養士處

官橋垂柳娘闌千古薛遺墟
駐馬看食客三千容易散
至今惟說一馮驩

李德繼

一首

德繼字子同鄞縣人由太學生選授光祿署丞
有借樹齋集

懷包參軍

極目西來山色秋但聞長笛不勝愁
故人家在清江上
潮滿門前月滿樓

劉成美 一首

成美字大卿漢陽人萬厯中舉於鄉由河源知縣歷官蘇州府同知有閒閒草

南還道中

春去花齊落人歸路轉賒峰陰昏霧合樹影夕陽斜溪
隔循紆徑橋危度淺沙停驂聊對酒醉處即為家

卞洪勲 一首

勲字世甫嘉善人司勲錫子官東鄉主簿有石

居集

歲暮述懷

戶外塵非隔庭前草不除
枝方慚畫虎賦已就枯魚燈
影隨風蕩鐘聲帶雨疎
半生無別嗜惟讀父遺書

田藝衡 一首

藝衡字子執錢塘人汝成子
以歲貢為休寧教諭有留青日札

月夜即席示座客

雲散江城玉漏遙月華浮動可憐宵停歌不飲君何待

試問當年李玉簫

自注玉簫蜀宮人愛唱王衍宮詞月華如水浸宮殿有酒不醉真癡人之

句

謝三秀

十三首

三秀字君采貴竹人萬厯間學官有雪鴻集

李本

寧云君采詩觸境生情緣情體物格整而不滯氣雄而不亢旨深而不晦致清而不薄辭麗而

不浮此治世遺音也陳伯璣云君采造語渾成即偶入纖詞不失大雅

詩話君采詩甚清穩由其生於天末習染全無此黔人之軼倫超羣者

城南江亭

旦發虹梁門暝投漁磯
路春水半篙綠寨棠不可渡溪
深烟復深遙遙辨庭樹

晚汎蕭湖尋宋人虞仲房石壁

川光鬱初霽野航恰受客
天空斷鴈哀水落寒沙積絕
峽響飛泉飄飄尺練白涼葉不禁霜
楓林還槭槭輟櫂
湖之陰突兀見瑤碧
恍疑太始雪拔地起百尺登眺極
人目了了淅阡陌胡為水窮處
乃有此奇石昔聞避地

者於焉卜其宅愛茲雲木秀重以巖潭僻靡旦匪蘭橈
或時仍拓屐遺詠蝕苔紋風流已陳迹高躅杳難攀我
來徒惋惜商飈增暮寒旨酒若為適興盡鼓柁歸滄浪
黯將夕

蠻娃曲

蠻娃出戶筠筐隨琇子穿環帕裹頤東鄰女伴競相逐
四月深山采葛時葛葉萋萋葛藤綠揆葛為絲給春服
經絲易脆緯絲柔裂指猶嫌絢不速破牕風急寒池生

流黃軋軋無停聲織成未敢問刀尺明日輸租應到城
到城杼軸歸公府吁嗟蠻娃亦良苦君不見北里春風
歌舞人曲罷羅裳棄如土

湯陰道上見楊花如絲戲作

古道多垂楊春殘花亦白
毵毵隨晚風到地忽盈尺
中原凋敝民力微安得吹上流黃機
若教織作機中素九月何人不授衣

安莊夜聞警

鼙鼓中宵急愁聞戰伐頻數家出煨燼一郡入荆榛地
亂難為客塗窮恥傍人披衣待明發華髮鏡中新

邨行即事

十里荒邨路尋幽到薜蘿陂寒菰葉少籬晚豆花多廢
寺紛蟲網貧家靜雀羅老翁晞髮坐相對說兵戈

送吳使君攝八番郡事

才子漂零久今看治郡功地當三楚盡山到八番雄詞
賦霜毫裏桑麻露冕中孤城饒吏隱解帶聽松風

夜集薛葵軒明府西巖

曲磴穿叢篠風烟憶武陵
飲能齊阮籍嘯或似孫登投
轄留山客呼船送嶽僧
江城無堠火薄暮見漁燈

焦溪雨渡

遠岸平蕪綠寒流似若邪
雨深人喚渡春老客思家
野葛牽青蔓溪藤落紫花
浮名是何物漂泊又天涯

辰陽晚泊

春流似建瓴春色晚冥冥
溪菜盤餐滑江魚匕箸腥
月

來沙漸白烟歛樹猶青
漁父方舟處聞歌媿獨醒

洞庭夜泊石門對月

平湖涵霽景涼月漾晴暉
樹極長天盡雲歸別島微
燈前秋社燕夢裏故山薇
誰念滄洲客飄零未授衣

西菴徑中萬竹脩然喜而賦此

負杖入深竹一盤仍一盤
鄰僧分路去野客到門看
不雨夜尤綠無風夏亦寒
素琴多遠思宜對此君彈

題趙文度畫西溪梅花

欲雪不雪天淒淒南枝北枝開漸齊因訪梅花過橋去
始知春在西溪西

王象艮 二首

象艮字思上濟南新城人仕為姚安府同知有

迂園詩集

董思白云思止風華秀絕骨力沉鬱
錯出大歷長慶之間 公孝與云思

止春容淹雅白真
韋澹自然神合

豫讓橋

義士負奇節所重在知己讓也慷慨流思仇惟一已將

以酬智伯勢必危襄子一往志不返肯以彼易此所重者一言所輕者一死荒橋至今在過者猶興起立馬對斜陽湯湯聽汾水

雨中登鹿角山宿趙荆石宅

厓古憑空閣峻嶒石徑斑龍源花外水鹿角雨中山幸有心知共無逢地主閒登臨無限意信宿不知還

徐成一首

成字竟之金華人仕為鎮國將軍

洞庭謁湘君廟

帝輦南巡竟不還，亂雲愁絕九疑山。
空憐湘水通三楚，遙想蒼梧近百蠻。
墮淚有痕留竹上，落花無夢返人間。
千秋哀怨存遺廟，悵望蘭旌不可攀。

吳稼塏七首

稼塏字翁晉，孝豐人。維嶽子以例除南光祿典簿，累遷雲南通判。有玄蓋副草，又北征南諧滇游諸橐。

詩話翁晉樂府如健兒騎駁馬左右馳突靡不
如意近體頗合西崑歸自滇南里居極絲竹雲
林之趣自號大滌先生病革語其子以布衣幅
巾斂謂如此庶足以見疇昔詩人於地下蓋以
貴郎自
懋云

礦山謠

朝采金暮采金草枯山根裂居民淚沾襟
狴狴之犬昔以吠夜今以給傳舍
喔喔之雞昔以司晨今以飽游民
水衡積錢爛如土何不詔取中官歸御府

牆頭草

牆頭草秋零春復抽胡不生彼庭中生牆頭庭中無不
可惡木枝蔭我又豈無野田塍農夫二三月荷鋤將見
凌牆上趨難為階託根高固其芟牛羊欲食不得食牧
豎過之徒歎息

歲晏偶成

歲云暮矣風淒然豆萁零落南山田疎篁掩映半庭雪
獨鳥棲息中林烟溪上老翁索魚價壚頭女兒催酒錢
衡門暫啟一失笑復有僧雛來募緣

秋懷 二首

金荊為枕紫荊牀已共秋塵委曲房燈下有情啼絡緯
機中無夢到鴛鴦明星爛爛愁天老爍火離離歎夜長
一樹桐花零落盡可憐梧子自經霜

重扃落葉迴相依羅袂無聲事已非寶鏡欲開鸞自泣
玉釵初斷燕猶飛旅葵未合生空井苦槩真堪染故衣
滿目清秋何所似白雲愁色遠微微

社日過山莊

背依叢竹面清溪茅屋蕭疎類灤西兒子社錢無用覓
田家秋釀且相攜梁間已去將雛燕階下新行傍母雞
一束荆薪蕪蘊火不愁山路夜歸迷

金陵酒肆贈茅平仲

暮年看爾壯心孤落落酣歌擊唾壺但數一錢憐姹女
纔誇千騎笑羅敷梨花雨濕紅襟燕楊柳春藏白頂烏
欲向盧家借雙漿莫愁不是舊時湖

薛文炳 二首

文炳字有孚嘉興人鴻臚署丞有調疴集

江城登望

三月清明近風光動客愁
葉齊江柳暗雲暝石塘幽
戰伐悲新鬼登臨憶故丘
南湖春欲暮羈思羨鳬鷗

閒居雜興

最愛江南小滿天
櫻桃爛熟海魚鮮
一聲布穀啼殘雨
松影半簾山日懸

王同軌 一首

同軌字行父黃岡人以貢生知江寧縣

行山中

雨餘林氣靜山晚日光斜野店依孤樹邨橋卧斷槎馬嘶遙澗水犬吠隔林花白首鉏雲者春風自一家

華善繼 三首

善繼字孟達無錫人仕為浙江布政司都事遷永昌通判有折腰漫草

詩話孟達詩
不及其弟

舟中迷懷

高城片雨外倚樵亂蟬鳴遠樹他鄉色浮雲過客情
泉甘知早竭木散得長生悔逐時人後空將骨肉輕

雨後

高樹留殘雨層城帶晚烟厨香菰米熟架滿豆花鮮
未改狂奴態還為長吏憐不因公事暇那賦白雲篇

春盡

即看春欲盡漸覺客衣輕燕以飛蟲下魚因落絮驚看

雲忘拙宦對雨憶躬耕最愛新移竹清風葉葉生

華善述 十六首

善述字仲達無錫布衣有被褐先生詩藁

王元美云

仲達詩翩翩霞舉或艱或易忽
沉忽揚瑕瑜互見不可為典要

詩話仲達與兄善繼孟達並有才名王元美列
其兄於四十子之列而仲達不與焉觀其詩品
矜奇灑落幾欲御風而行一時詞客未或過之
而元美序之謂不可為典要是亦拘牽之論已

長相思

長相思相思長幾許黃河三三曲曲通牛渚巫山六

六峰峰度神女枯槎不來雲不雨夢落風波安可語

休洗紅

休洗紅洗紅紅可惜初洗猶作黃再洗漸成白紅芳既去質亦移雖有茜草將安施

海樓篇

上客且歸休我歌送行舟君家近東海海中有瀛洲瀛洲不可見但見金銀樓此樓誰為之無乃蜃氣浮相望邈無梁引領成悲愁

濠梁篇

濠水清若虛，儵魚此中居。
儵魚何所樂？水濶忘呴濡。
莊惠去已久，懷古思有餘。
子是梁上人，非魚諒知魚。

雜詩

白髮白更長，白花白更香。
春風一相見，歲月久難忘。
君耕石田熟，余亦起羣羊。

山中作

達士貴薄游，幽人安坦步。
耿耿梧月初，蕭蕭竹風暮。
握

蘭青厓陰采蘋寒水渡荷衣秋始製何用畏多露

答錢化臣

玄蟬餐清風長日鳴茂林蟋蟀飲繁露永夜莎根吟二
蟲夫何知聽者多苦心絃桐與無絃視之誰非琴曰余
室湖渚開口當遙岑既無簪組累又鮮轅馬臨終歲足
暇豫長謠散幽襟偶為好事傳詎取時名侵媿君錫嘉
譽撫已安可任

重送世叔

清樽可續沽孤舟且緩發款款垂別語皎皎初圓月幸
自合一心無令歎華髮

庭草作花有感

中庭無嘉植青碧翳芳草秋至花亂開翠色亦自好既
不藉溉灌復無採摘擾無名且無種生意可常保

今夕行

今夕何夕露為霜湖中之水寒且蒼明月倒落水中央
遡游從之葭莢香雲山層層思難忘我有故人隔他方

三年不歸松菊荒誰謂河廣一葦杭爾獨胡為勞我腸
湖中之水歌

湖中之水常東流眼前無事不可愁貴如博陸死夷族
富如衛尉生斷頭勲如淮陰竟菹醢親如文信俄仇讎
唯有文章稱不朽高名往往垂千秋試尋名下人安在
左馬屈宋空土丘不朽者文朽者骨寸心枉作蛛絲抽
自古多才更多累我獨何為生煩憂

招隱吟和伯氏

招隱吟寒山蒼蒼日欲沉風來萬木皆蕭森飛泉激石
流清音聽之如玉復如金須臾月出罔兩侵猿鳴後林
鶴前林青松白露光淫淫珠璣墮地不可尋有美一人
薜荔襟橫陳古昔三尺琴一指未下意已深廣陵之散
愁人心抵節高歌招隱吟

蟠桃思

蟠桃開花予共汝十日瑤池白雲語蟠桃結子汝棄予
萬里澤國紅塵居等閒便擲三千歲相憶那無一字書

旅懷

萬里秋將盡孤舟夜未殘
獨愁成淚易清夢欲歸難
鴈落繁霜白鷗飛片月寒
朝來行客鬢映水默相看

晚秋鄒靈壽見過

野田猶汎濫籬落亦荒蕪
啟戶聞鳴鵲停舟散浴鳧
愁來說鴻寶酒後憶雕胡
君定知朝事今年可賜租

寫懷

薄俗空相苦寒泉只自甘
鶴應知夜半狙不喜朝三北

斗懸牕北南山橫舍南從教斷來往端坐待鸞驂

梅守箕

九首

守箕字季豹宣城縣學生有居諸前後集

詩話梅氏一門羣從禹金最負時名嘗後先過
王元美元美贈之詩云從誇荆地人人玉不及
梅家樹樹花季豹為禹金從父譽雖稍遜
禹金然詠懷諸作恐小阮亦當避席也

招隱曲寄吳允兆

勝游不擇塗山樓不避幽魚鳥有本性何以異沉浮昔
者東方生金門可優游亦有嚴君平足跡謝帝州真情

愛松桂同器忌薰蕕輪轂淹泥淖樽俎潛戈矛流塵眩
目光魑魅走道周舍旃盍言旋春草盈芳洲

詠懷

三首

飛閣臨馳道櫺軒俯四隅遠望可當歸何以心不娛夾
蒼叢灌莽第宅成丘墟魑魅嘯中林夜啼猿與烏密親
不我與我友不我俱拊劒明所懷託情於素書

愛極翻自疑驩極易以悲所以樂莫樂固在新相知皎
皎中天月虧盈尚有時惠思念疇昔忉怛無好懷歲暮

空堂上明星照我扉身各天一隅安知渴與飢慰我同心人膠漆未可期

索處無適懷羣居興怨尤素交夙已盡闌闌起相仇甘醴善逆人終始寧為謀同心託蕭艾一器戒薰蕕匿怨而友人見鄙於左丘信哉朱穆言獲我心所求

雜感

獨坐不能寐振衣將遠行悲風自南來吹我襟與荆河水何泱泱中有好鳥鳴我欲往從之惜哉已徂征白日

難少留年歲忽已傾願借明月暉流光燭我形

古詩 二首

日月易流邁哀榮魯何期霜霰忽來集衆芳忽已辭物
象貴其新故心誰當持懷念如夙昔中情苦不怡人生
一世間離合亦有時超忽即變化展轉焉可知

郭東亦有墳郭西亦有墳登城一以望纍纍正相因狐
兔穿為巢魑魅託為鄰潛燐不自照幽路何由伸陰風
卷秋草日莫常悲辛

送吳允兆

秋氣何寥廓處羈旅間淹留蹇無成惆悵私自憐
駕車出行游願從吾所驩所驩良已篤情好若蕙蘭素風
飄廣路枝葉忽以殘結誠殊匪薄永久思弗訾敘意衷
所期令德思勉旃

贈祁羨仲

有序

羨仲俠士能詘伸好奇策少游豫章乏食即行
乞市中

客游小四海不裹千里糧城中乞食已忽醉胡姬旁縱
橫狹路間褐夫視侯王吁嗟不逢時蓬累職所當

梅鼎祚 七首

鼎祚字禹金宣城人國子監生有鹿裘石室集

歐楨伯云禹金五言古蒼然骨立七言馳驟樂
府時極杜陵之致近體氣純而完聲鏗以平思
麗而雅 王仲房云禹金詩確守風格乖僻不
生奇宕時作 沈君典云梅叔子天才駿發詩
如王子晉來緱
嶺清吹泠然

詩話禹金周見洽聞著書甚富詩乘文紀之外
旁及書記小說兼精傳奇所填韓君平玉合記

為詞家所賞有云風中絮陌上塵歎
韶光何曾戀人亡友王介人極稱之

雜詩

智愚無常稱妍蚩無定容名德貴易立顰笑賤難工登
高疾赴響所處固已崇流俗快目前安得察其終

雜感

忽忽中不懌駕言陟高丘高丘臨四野湛湛長江流豈
不懷所歡欲濟無輕舟佳期曠何許歲月倏已遒蹟往
既非故撫來難豫謀俛仰千秋間涕下不能收

雜懷

鷗雞厲其羽玄鳥歸故鄉日夕涼森發大火戢朱光陰
氣馴以至草木率焜黃九六代為窮龍戰血縱橫堅冰
自有時聖人戒履霜

哭麻鴻臚

驚風下平楚白日歸虞淵彼此相代謝時至有固然所
以上知士往往不待年比歲在龍蛇汝命竟不延詎意
黃公壚倏忽成河山逝水豈顧反行雲何當還形神曠

不接而况尋笑言先後等斯須喟焉推心肝

金陵寄王仲房

宛水一為別金陵再寄書王家桃葉渡秋日柳條疎客
久少知已吾將歸弊廬向君尋舊約百里共樵漁

金陵客懷

乙酉暮
秋作

恣意游能數多懷望轉迷清秋雙闕外佳氣二陵西鴈
已先霜下鳥仍近夜啼都亭酒太惡不得醉如泥

九月八日城東樓晚眺寄史使君姑孰

落葉來鴻秋可憐孤城晚眺正蒼然向傳李白題詩處
重見玄暉在郡年霜後鳴磬千戶月風前哀笛一江烟
倚闌却憶龍山會誰共黃花插酒邊

梅蕃祚一首

蕃祚字子馬宣城人鼎祚從弟官寧鄉主簿有
涉江草王程草

詩話子馬與季豹禹金同負詩名王元美詩較
他羣從更高華蓋指子馬言也然非季父賢兄
之比

重過道南叔山居

谷口子真宅松蘿境自偏
當牕懸衆壑隔樹見飛泉
送客柴門下尋僧野寺邊
時時來取醉人道竹林賢

汪道貫

三首

道貫字仲淹休寧人道昆弟有汪仲淹集

李本寧云

仲淹詩頡頏其兄才情
節奏出入陶韋王孟間

贈鄧孝孺

聞汝幽棲處澄湖一片明
青衿生事拙白髮著書成
澤

國堪高卧山田足耦耕華陽仙路近千古傍茅盈

鄉榜被放作

得路難如此飄零似去年曉風池上月秋水鏡中天吐
吐悲生事勞勞問酒錢啼猿與征鴈總使淚潸然

題扇

落日照前溪倒影映紅樹幽人不出山白雲自來去

汪道會一首

道會字仲嘉休寧人亦道昆弟諸生有小山樓

橐

李本寧云仲嘉秀色天然盡去雕飾

過王百穀

秣陵三月柳含烟猶憶城南送酒錢
雙槳暮潮桃葉渡
一尊寒食杏花天江門隔歲書相問
吳苑今宵月再圓
執手莫須論往事傷心近廢鵲鴿篇

劉潤一首

潤字德祖歙縣人有鶴嶼集

寄王仲房

不見風流王右軍詩名湖海日相聞
歸期漫阻黃梅雨鄉思遙懸白岳雲
千里音書秋後斷一江南北夢中分
潭園草罷閒居賦誰共清尊醉夕醺

劉 澳 一首

澳字本瞻潤弟

九日同葉茂長汪和叔登高燕集

九日他鄉菊未開相逢同上竹西臺
江南木落千峰出薊北風高一鴈回
笑指青山懷杖履羞看白髮會歸來

明年此日難同賞
烟雨何妨數舉杯

吳元樂

三首

元樂字振之休寧人

春日有懷仲仁

獨行墟落間
舊徑生芳草
一見蝴蝶飛
三歎青春好
故人不可同
能無傷遠道

八月十二夜作

暝鐘初定後
秋氣漸深時
顧此蒼苔上
泠然白露滋
蛩

還依砌響月自隔林移不見素心者空懷夙昔期

湖上憶別

河橋三月水平津兩岸輕波漾綠蘋
曾向此中傷遠別故人今隔幾回春

產科一首

科字

缺


望江人由貢生萬厯中知通江縣事

茗山洞

羅隱曾隱此山有蓮花峰相傳仙人嘗憩其頂

峰陰迴合擁青蓮詞客遺蹤尚儼然
啼鳥故疑歌白雪

飛泉猶似奏朱絃
林扉蕭瑟無塵躅
石室逢迎有洞仙
安得向平婚嫁畢
拂衣吾亦弄雲烟



明詩綜卷六十七

欽定四庫全書

集部

明詩綜卷六十八

詳校官中書_臣涂日煥

主事銜_臣徐以坤覆勘

總校官降調編修_臣倉聖脉

校對官庶吉士_臣潘曾起

謄錄監生_臣楊恪

欽定四庫全書

明詩綜卷六十八

翰林院檢討朱彝尊編

宋登春

三首

登春字應元新河人有鵝池生集

靜志居詩話王喬之玉棺桓司馬之石椁可以
謚曰至愚然而楊王孫之保葬劉伯倫之荷鍤
便埋亦矯枉之過也鵝池生語邢子愿云君視
宋登春豈杉柏四周中人行將浮錢塘脫履江
干乘潮解去既而果躍入江魚腹之葬果勝於
一棺之土乎君子識其誕矣生詩平淡寡深思

不夫為賈浪仙
李才江一流

薊門

桑柘兵殘後人家夕照中天秋沙鴈沒月冷戍樓空選
將燕山北擒生遼海東城南餘戰地燐火夜深紅

九月三日方別駕攜酒殽見過因懷徐荊州

客淚秋能下人情老自知塞寒鴻鴈早江暖菊花遲對
酒憐吳語聞歌憶楚辭明年誰更健重把紫萸枝

秋日野望

聽鳥中林性看雲故國心地卑湘漢濶天遠洞庭深老
馬空知道窮猿豈擇林十年書劍客寂寞到如今

陳昂 三首

昂字雲仲莆田人有白雲先生集

詩話山人以倭亂率妻子奔豫章織草屨易粟
不給則賣卜已而入楚蜀轉客金陵間賣文為
活既窮以死其自序略云昂於詩尤嗜五言第
家貧無書誦王右丞即作師右丞誦杜工部作
即師工部可謂多
師以為師者也

宿江邊閣

暝色江邊閣行吟易斷魂
風前兩岸葉月下一聲猿
夜哭誰家婦寒號何處邨
洞庭春水動雇艇去荆門

閩南登樓

切莫登樓望令人更慘淒
戰場多鬼哭息壤聚烏啼
黃霧埋城郭寒風死鼓聲
深樓巢燕子來往亦銜泥

移居巴陵

此即巴丘戌相傳魯肅城
古今餘往事兵火剩殘生
楚水為漁便湘山結室平
地靈如獲託亦足寄遐情

馮

遷

七首

遷字子喬上海人有長缺齋橐

潘子仁云子喬承叔菁英鋪張

平實吾見其進未見其止也

朱邦憲云子喬緣情定體因體鑄辭雄麗雅澹之言皆備

詩話子喬詩出辭似淺而鍊格頗道澹之汰之沙礫自去

與俞仲蔚

仲蔚青雲姿偃蹇山澤間遺棄當世事賦詩獨精專大雅既寂寞下接蘇李肩晨昏弄筆札几席生雲烟流傳翰墨林字字堪磨鐫相過遇佳夕春風盎和顏燃燈設

清醴微興相與宣高懷曠千載鬱鬱忘冥筌所嗟歲云暮何以奉周旋

病卧十日城中米價騰踊感而賦此

兒童負粟朝出市日暮歸來哭不止斗米新騰價百錢
布匹雖行賤如水盡言久旱江水枯賈舶商船難到此
城南早稻秀不實城北晚禾乾又死悲哉野老啼無聲
十日病卧茅屋裏

送唐世其北上

君去青山外予吟綠水邊忘機鷗性狎快意馬蹄穿魏
闕通霄漢吳臺思管絃遙知聽雨夜定憶小樓眠

潘伯明邀飲朝天宮

邀我來仙界林深引玉笙坐來黃鶴舞醉倚白雲生江
作千年塹山圍六代城興亡易悲感何地訪初成

荆溪夜泊

細雨延春酌寒雲濕暮鐘客舟依樹小野火隔溪重風
水期無定登臨興轉濃明朝買雙屐共爾躡羣峰

復餞顧內翰於南浦因經曹公戰壘

映竹船牕水氣涼
渚風微泛白蘋香
今朝相送即相別
明日故人非故鄉
蔓草女牆橫斷靄
荻花軍壘護斜陽
銀河舊與滄波接
一望靈源萬里長

葉之芳

五首

之芳字茂長無錫人有雪樵集

寒食金陵病中作

東風吹短褐
寒食傍天涯
客舍孤城雨
鄉心二月花
遠

山青極浦芳草綠平沙不盡王孫淚年年感物華

靈江舟中

赤城東去水滌洄無數寒花夾岸開越國青山臨海盡
靈江秋雨挂帆來舟中客淚隨楓落天外鄉心逐鴈哀
如此蕭條須盡醉已知淪落不言才

送韓漢章自楚還蜀

河梁日暮罷離尊送爾西游入故園湘渚月明春飲馬
巴江花落夜聞猿青山易墮天涯淚芳草空消客路魂

何事不歸嘗寄食道傍誰解惜王孫

題江邊柳

揚子津邊柳秋風葉乍凋生當離別後不得長長條

入新安

可怪新安水舟從石上行千尋猶見底不數越江清

柳應芳 三首

應芳字陳父海門人有柳陳父集

姚園客云柳陳父詩如田

舍翁暴作封

君舉止生澀

詩話陳父僑居金陵之杏花邨每出行吟倪首
沉思觸人肩而不自覺語所知曰作一詩必離
魂數番乃得稱意昔人所云撚斷數莖髭用破
一生心不過是矣其詩頗選高格第去七子仍
遠未

送周京兆建言再謫代州判官

向託湘流弔屈原十年岐路不堪論
到來京兆纔三宿
謫去承明只一言
馬邑秋高邊月近
鴈門春盡塞花繁
再投萬死風霜地
猶感全生聖主恩

初聞倭警有感

東倭海外播風烟回首扶桑氛祲連
白羽插書傳幕府黃金刻印拜樓船
朝廷欲問來王日父老曾經入寇年
辛苦折衝胡少保永陵一詔至今憐

春閨

黃鶯不隻啼紫燕還雙栖栖在安梁上啼向妾牕西

安紹芳七首

紹芳字茂卿無錫人國子監生有西林集

葉茂長云

茂卿學贍才高生不得志有浮雲當世之志厭
栖鄉曲慷慨遠遊興至為詩調高辭秀起拔時

流俞美長云茂卿詩不追逐
時好搦管抽思一以清婉為尚

山中夜坐

夜氣何蕭森空山思寥廓不知風露寒彌覺衣裳薄美人渺難期對酒不成酌白日虛牖生微聞桂花落

旅泊

秋盡仍為客江寒獨繫舟微霜下水葉遠火露蘋洲無那風前鴈偏生枕上愁孤帆明更發何處復淹留

送曾中丞入蜀

玉節遙看萬里行
鳴笳吹角動西京
天邊劒閣雲連棧
樹裏巴江錦作城
檄到百蠻新喻蜀
圖開八陣舊藏兵
寨帷父老煩相問
辭賦何人似長卿

花津

水上春霞明
花開幾千樹
不是避秦人
人疑避秦處

一葦渡

夕陽下前溪
西風吹野渡
不見折葦人
獨立滄江暮

春盡日寄華公衡

惆悵春風暮懷人興轉孤夕陽空極目芳草隔南湖

柳枝詞

赤欄橋畔柳絲長帶雨和烟總斷腸肯向西風恨搖落
願留春色待蕭郎

聞龍三首

龍字隱鱗鄞縣人處士有行藥吟幽貞盧詩集

屠田叔云隱鱗詩如溪上人家曲几疎牕長與
水雲弄色王右仲云隱鱗詩清和穩暢卓然

成家

詩話隱鱗為冢宰莊簡公孫以孝友德行聞於鄉里初不以韻語自負然其近體頗聞整特少警拔耳

山居即事

積雨朝來歇諸溪盡急流隔河看飲犢倚檻有浮鷗雲冷松根石風微竹外樓蕭然無一事開徑遲羊求

送趙彥忠游吳興

吳興舊游地遠想尚依依荻岸青簾舫桑林白版扉計程千里近屈指一年違從此斜陽外看山悵獨歸

聞吳少君病而阿霽死悵然懷之

來往家無定饑荒病未蘇路危僮僕盡身老子孫無何
日忘機事全生付酒壚榮期自有樂不用哭窮塗

譚清海一首

清海字永明東莞人有靈洲詩草

詩話處士以布衣思自奮功名永陵時上言十
事不納穆宗即阼復走京師進三大禮疏其略
曰我太祖高皇帝文德武功前此未有一傳至
建文君紛更法制文皇帝於是訓兵除之即位
之後悉復洪武舊制夫成祖未即位之先建文
君天下者也四年以來其措置雖不足觀然有

一日之君必有一日之政事而使之湮沒不傳
將來者何以徵也且洪武三十一年爾今曰三
十五年豈賓天之後猶能撫綏四海統理萬幾
此非所以示信也陛下宜勅令史官修其一朝
實錄仍以建文年號復告高廟而追謚之庶幾
文獻足徵可以信今而傳後矣又按正統十四
年也先入寇大同失利太監王振不與大臣謀
議獨挾天子親征命郕王居守師駐土木天子
蒙塵京師大震皇太后召百官入集闕下命郕
王權總萬幾既而復命郕王宜早正位蓋以時
方多事國賴長君故也王涕泣固辭於時文武
羣臣交相勸進然後不得已即皇帝位夫土木
之難非國家大變哉當是時社稷為重君為輕
使非景皇帝預登大寶臣恐天下之事難言矣
況多難之秋薦任于謙選將擇能練兵主戰宗
社不至於南遷伊誰之功歟及英宗皇帝駕還

景皇帝迎拜相持而哭推遜良久授受之意昭
如日星一旦不豫英宗復位此天之所順也人
之所歸也而賊臣徐有貞輩廼貪天功以為己
功首倡奪門動搖國本駕言定策獵取侯封構
骨肉無己之禍端損國家萬年之元氣遂使景
泰七年君臨天下之號一旦改除于謙社稷之
臣竟死刀下每讀國史流涕傷心不能不飲恨
也英宗復鑒其誣深懷怨恨未及改遽爾上賓
憲宗敦念親親用成先志上尊謚曰恭仁康定
景皇帝然而未得稱宗未饗太廟歷朝因循實
為缺典夫人臣有功於國者猶得附饗於廟而
況正位於九重之上七年之間社稷攸賴德在
天地功在祖宗不幸晏駕一二讒賊之臣廼隨
而媒孽之遂至不得以列羣宗而安廟祀孔子
所謂正名之義安在今陛下即位之始宜明詔
中外尊為某宗祔祀太廟以正一代昭穆之倫

以敦萬世宗親之義仍以于謙配饗用報有功
復勅有司震暴有貞之罪削其官爵夷其墳墓
以為將來不忠之戒庶幾祀典可明而典刑可
正矣又按太祖高皇帝首建太廟為同堂異室
之制而奉玄恒裕淳四帝居之成化間九廟已
滿下詔議祧於是以至皇帝為始祖以太祖太
宗為世室於寢殿後建祧廟羣主以次遷入焉
至嘉靖十七年先帝斷自宸衷獨奉高皇帝為
不遷之祖改號太宗為成祖復上獻帝為睿宗
而竝附九廟祀焉夫太祖有功于天地創業垂
統為萬世計尊之為始祖禮之正也獻帝篤生
聖子入繼天朝我先帝一念報本之心不能自
已而尊之為帝祀以天子之禮此猶可以義起
者若升祔九廟而與列聖竝饗臣不知於義何
取於禮何居天下之分奚辨乎昔武王纘太王
王季文王之緒以有天下是天下者太王王季

文王之天下也故武王得以追王太王王季文
王也猶我太祖之追尊四祖也今先帝所嗣之
緒果繼之獻帝乎抑繼之祖宗列聖乎使繼之
祖宗列聖則先帝之天下祖宗列聖之天下也
先帝不得而私其親也今饗其親於九廟之中
則是先帝之天下既受之祖宗列聖矣而復受
之獻帝謂非有兩統乎此一人之私也非天下
萬世之公也我朝之制子為天子其母稱太后
不稱后不得竝嫡同饗於是奉慈之殿所以
明微也陛下謂君臣之分與嫡庶之分奚殊焉
獻帝本安陸之藩王曾北面於武宗者今升祔
九廟而與羣宗竝列則是儼然居武宗之上矣
為天子之母者不可以庶而竝嫡為天子之父
者獨可以臣而尊君哉臣聞獻帝在藩邸時克
遵朝廷制度惟謹天下稱順焉故於其崩也而
武宗謚之曰獻夫生而能恪守藩臣之禮未有

死而肯倒置冠裳者也今儼然居武宗之上臣
恐獻帝在天之靈必以上下之分不可踰也禮
義之防不可越也祖宗相傳之統不可私也將
感然不安於其位矣夫祭者所以安先人之神
也既感然不安於其位則又何愛於附饗何取
於太廟哉陛下下方將秉正奉公為天下矜式必
不以私親之故而廢禮其勅禮部會多官集議
再訂廟儀務求典禮之正庶於祖宗祭統不至
生嫌獻帝神靈得以安饗而亦不失先皇尊親
報親之心祀典由是而正禮義由是而安天下
之分由是而辨而萬世人心之公定於此矣以
上三事皆言人之所不敢言且倡議於楊時喬
詹沂劉曰梧歐陽調律諸臣之先而實錄不書
野史失載故節錄之處士善談兵見知於戚少
保歸隱羅浮見日峰
鄉里稱為見日山人

西游別貞復

君望東海歸予從西粵游興言感今昔行路何悠悠
白日往不返頽波逝東流青青澗中蒲泛泛江上鷗
連枝與比翼庶以解我憂

楊承鯤

七首

承鯤字伯翼鄞人太僕卿美益子國子監生有
西清閣詩草

詩話伯翼論文謂先民有作穀率存焉不入穀
率雖工無當也論詩厭薄王李謂暗中摸索知

為今人之詩惟誦之不類今人而不蹈古人之
迹斯善矣譬如學書然方其心慕手追必盡肖
古人及其成也不必盡肖
乃成家可稱知言者也

七哀詩

二首

朝發桑乾河暮宿樓桑邨王氣久消落靈跡祕陳根物
色遞遷化日月屢崩奔奈何此征夫跋涉無朝昏驅車
冒榛荆忍飢過市門餘雪照墟里頽陽藹荒邨隴墳鬱
相望賢達無一存顧彼翳桑人太息涕潺湲

客行無昏曉乘月理歸軒仰視明河低畢昴正闌干繁

霜生肌骨齒戰不能言空野無人聲雞犬互悲喧羸馬
為哀鳴僕夫自辛酸行行日已老帝鄉日已盲朔風裂
緇衣客歸苦不早燕雀懷故棲游魚思在藻日月逝不
處誰能長美好眷我平生親言旋永相保

無能

漠漠島烟合紛紛林月生小山全入霧大水半浮城鳴
櫓通晨過疎星永夜明無能逐世好嬾與癖相成

寄題江心寺

勝絕江心寺江空墻影長潮痕剝斷石海氣濕危廊僧
老秋無寐鵬寒翅有霜英雄餘涕泗風雨弔殘陽

小山

還山抱黃犢沙草日蒙蒙竹屋難禁雪松門不掩風香
餘栗葉火寒落桂花叢寥落清江外吾生亦有終

小山歸得長文書及新詩二首兼惠茅栗如數奉
荅

茅栗何年種分匡見小溪色兼霜芋早味與露葵齊歛

袖呼兒子嘗新媿老妻永無懷橘日剩有萬行啼

脩園觀刈稻詠懷

老覺衣裳薄寒推捃拾頻尋常邛徑小來往路人新
治靜飢魚出林早宿鳥馴雞豚與閭巷不厭野夫貧

諸葛鯨一首

鯨字君騰襄陽人

一云蘭溪人

渝城人日簡字給事

訪舊來何晚輕帆落驛亭江迴劒外白山繞漢中青萬

里逢人日孤城感客星
知君懷諫草翹首望明廷

沈懋嘉一首

懋嘉字會真平湖人懋孝之弟諸生有白巖遺

藁

秋鳥

陳山西麓海東頭
細網長竿帶綠韝
買得山禽如粉脆
屠墳十里稻花秋

詩話吾鄉屠康僖墓在乍浦陳山山濱海宰木
翁鬱每東風起有鳥海外來集於樹土人張羅

持竿捕之。大者曰鰓，毛鷹亦曰鰓。鰓中者曰花雞。小者曰鰓。離剖其腹，有青椒，其骨甚脆，號為秋鳥文學詩。蓋紀其實。

裴邦奇一首

邦奇字庸甫，聞喜人有巢雲集。

望嶽

衡陽秋色翠

一作碧

氤氲南望蒼梧隔，楚雲自去重華招。

不返月明瑤瑟怨，湘君

黃維楫二首

維楫字說仲天台人

送王元甫舍人使襄藩

玉門將醞酒使者捧銅圭
玉節湘雲外星軺漢水西
恩頒丹鳳詔歌唱白銅鞮
山簡流風在能無醉似泥

武林與王符李葉四博士夜酌

烟草碧連天吳山春可憐
客情千里外鄉語一尊前
細雨鳴深夜疎燈照別筵
關河又明發罷酒各淒然

陳有守 二首

有守字達甫休寧人有六水山人詩集

徐子與云山人

詩篇雖不盡離津筏而體裁宛密大雅不羣

詩話山人好游轍跡遍湖海以郡有南浦六水胥滙於川注海遂自號六水山人一曰天瀛山人又曰斗下老人自比沈麟士王孺仲其詩取材目前不甚鎔鍊所選徵郡詩斤斤繩墨不失正音

游邵氏園

極目眺遠山振衣出東郭白雲媚幽岡蒼烟澹長薄登
皋一舒嘯餘響應林壑空緇城市塵未諧江海諾夙心

愜超曠世故任龍護

觀音巖

紺閣披雲竹樹參天花傳說見優曇妙音一去諸天遠
癡絕行人拜石龕

盛時泰

二首

時泰字仲交上元人貢生有蒼潤軒集

詩話沈啟南題倪元鎮畫云筆蹤要是存蒼潤
畫法還應入有無盛仲交畫師元鎮文徵仲遂
以蒼潤題西冶城之小軒仲交性愛山水去郭
二十里為攝山山之左有大城山結精舍其中

時跨一青驃欣然獨往嘗為子娶婦其妻戒勿
他往忽隨友人往城南古寺數日乃還妻愠而
詈之乾笑而已張肖甫開御史臺於句容仲交
醉過戟門之鼓肖甫曰安得此狂生必盛仲交
也邀入復飲達旦乃別萬歷初元以陪貢試吳
下肖甫謂曰子過姑蘇宜一謁王元美遂攜所
著兩都賦謁元美於小祇園元美贈之詩曰遂
令陸平原不敢賦三都又三日之內遍和元美
擬古詩七十章元美為之氣奪云

初春送朱比部

幾年官寄白雲司日日行吟湖水湄五馬西川今作守
一尊南郭暫相持天邊雲樹依臺遠雪後春濤出峽遲

自昔蜀中饒勝蹟品題應是待新詩

寄武林朱九疑

湖上輕風拂柳條美人吹笛向平橋
欲知胥浦潮初退正是秦淮雪半消

張正蒙 二首

正蒙字子明江寧人

顧太初云隱君年九十餘猶能日行數十里無倦不

多飲酒而善飯如壯夫詩法中盛唐饒王孟韋柳之趣

商人怨

江上商人歸試問商人事商人不敢言相對但垂淚
過王德載牆東別業

舊是君公隱相期共避喧落花春雨巷垂柳暮烟邨
外青山出尊前白鳥翻澗聲流不竭吾意欲尋源

馮敏効 一首

敏効字忠卿平湖人給事汝弼之子有小有亭
集

舟行

水遠連天碧秋深共客寒孤舟迷去路頻對夕陽看

程伯陽一首

伯陽字師道歙人

王仲房云師道家貧賣藥自給詩多漫興而沉思者自入

法

過南山懷許宣平

仙人去已久訪古經南山丹竈亦已沒白雲長自閒風
吹桂枝綠雨落桃花斑空傳負薪句沽酒何時還

馮科一首

科字子盈嘉善人布政使盛世之父有東臯吟

吳江逢越客徐生

賣藥長為客浮萍寄此身因沽吳市酒得值越鄉人白
雨三江暗丹楓十月春追思十載事不覺淚沾巾

孫文麓一首

文麓字伯諧歙人

王仲房云伯諧好神仙山居獨行洞簫在佩不顧俗人訕

笑其詩任性放吟嬾於祖述間有合作便越凡情若行人欲問前朝事翁仲無言對夕陽足稱佳句

逢鄉人

爾從山中來恰喜江上遇吾家老梅花開到第幾樹

曹昌先一首

昌先字子念一字以新太倉人

少年行

長安兄弟舊知名半是期門半射生醉就胡姬壚畔宿
明朝齊赴受降城

欽叔陽 三首

叔陽字遇公吳縣學生入國子監有集

詩話太監孫隆以督織造駐蘇州朝廷方起稅
額惡少年行賄充委官乘輿張蓋勒索商稅民
不堪命崑山人葛成率衆二千人分作六隊一
人搖蕉扇前行後執挺隨之知長洲縣事鄧雲
霄見民情洶湧擒委官頭目械於玄妙觀衆立
毆死裂其尸知府朱變元勸諭始得解散此萬
厯二十九年事也時葛成慷慨就獄後得宥罪
又二十餘年而有顏佩韋等實先啟其兆云遇
公謠凡一十三首茲
錄其音節近古者

稅官謠 三首

四月水殺麥五月水殺禾茫茫阡陌殫為河殺禾殺麥

猶自可更有稅官來殺我

千人奮挺出萬人夾道看斬爾木揭爾竿隨我來殺稅
官

稅官來百姓哭虎負嵎猱升木壯士來中貴走十二人
三授首歡樂崇朝不及夕倏忽頭顱已狼籍投畀烏鳶
鳥不食

張名由 二首

名由初名凡字公路蘇州嘉定人有張公路詩

集

詩話公路居平世而好言兵棄家產僮僕以避徭役可稱知幾之士蓋先唐婁程李四子稱詩而學文於震川者

吉貝辭

禹貢故江道今已失其真西亂北入婁浦東接春申中
淤百餘里高飛起黃塵三年棄不治地頗生理殷九夏
攫鉏出三時雨露新吉貝萬餘頃其葉何蓁蓁杭稻產
三吳初不係海濱陵谷日變遷造物亦至仁嗟嗟肉食

謀此理難具陳

空堂

秋蟲響空堂
纖月下幽渚
鳥驚風外林
花落庭中樹
羈棲興遠懷
城河隔新雨
耿耿良不寐
脈脈以無語

俞安期

十三首

安期初名策字公臨既更今名改字羨長吳江

人有琴琴集

朱雲子云羨長語多雄壯如望海云星臨東極無分野山入南荒有

沃焦廬山絕頂云爭趨大海千江定纔入中峰兩郡分寄臨洮監司云桃花東道來天馬木葉

西山見玉狼寄建昌兵備云笮馬全散
歸漢北竹王那許檀南中皆名貴可傳

詩話美長之名由元美明卿伯玉而成詩亦兼
綜三家原本李獻吉長於獼祭賦景有餘言情
不足如入隋苑觀翦綵花青紅碧綠非不
爛然奪目即而視之與根株總不相附

烏沙阻風

獵獵間闔風吹彼江漢流崩流一何急阻我西行舟擔
篙引百丈人力非不周但如宋都鷁退行良非謀旅情
既昏亂朱炎苦相讎畢竟泊楓林繁陰結綢繆憶從辭
妻孥再見蓂葉抽前期猶漫漫返顧多沉憂沉憂不能

揮奮思戈青丘

武夷 二首

晨興命篙師溯流泛清汜鷁首轉石湍九曲茲其始峰
巒縱異姿崖壁夾重詭參錯駭愕形萬狀不相似林林
從孤舟紛紛列兩溪回眺天柱石端立若冠峙其上亦
宏奧云有天池水易代投玉簡遣使歷千禩子騫謫居
時仙客咸來止晉代八真人異姓四女子謫籍周有期
上昇具由此控鶴彼何人曾否來主禮

繫纜仙船巖三曲漸已及云何二仙艇中壁懸石隙歲
月固不知神化亦奚測更無堯年潦安得逮茲息豈墜
絳渚間天路將安適或由巨靈掌攜之化人國莫謂藏
壑牢夜半負有力願借拯迷津衆人免沉溺

神鴉行

甘將軍廟富池口廟前羣鴉何太馴商舩經過浪索食
撲刺雙翅飛近人上投餅餌或片嚙高挈低攫疾若神
競言此鴉莫彈射將軍精靈所變化中之不斃亦不傷

風波恐使神明咤吁嗟乎將軍氣槩籠古今強吳捍魏
人所欽精靈縱化亦貔虎安得瑣瑣為微禽神鴉神鴉
汝曹憑藉將軍力不加彈射還投食何殊僕隸在權門
安然請索無不得

卜居陽羨

雞犬成墟落蕭蕭半畝宮湖山元作長田舍復稱翁五
口中人產千家太古風無由知帝力耕鑿自為功

憶家

故國千山外，經秋遠別離。
浮生能幾日，為客此多時。
衰眼高堂淚，寒砧少婦悲。
天涯念游子，風雨共淒其。

青草湖

秋霜枯洞庭，秋草入湖青。
漁屋遷卑壤，風帆就遠汀。
鴈鳬沙不整，魚鼈塹多腥。
回想波濤日，陰沉託水靈。

過洞庭湖

南北占星日，相隨任遠飄。
輿圖輪浩蕩，舟楫變昏朝。
鴈力翻風盡，蛟宮隱浪遙。
最憐無定處，雷雨失青霄。

望海

積氣茫茫九水都望來空濶盡東隅
雲霞午夜浮光動
雷雨中流片影孤
日有靈鳥棲析木
時無游馬繫秦蒲
島夷向識滄波道
烽燧防春亦遠圖

送顧道行副憲之山東

鬪難走馬俗稱雄
絕島窮邊路亦通
卉服仍教歸禹貢
短衣須遣變齊風
嶽雲今古懸封上
海日尋常起夜中
我有所思愁遠道
自今長望泰山東

登祝融峰

中天積氣入清涼
雲霧翻看地混茫
雨挾蒼龍奔下嶺
星懸朱鳥定南方
何年石簣藏金簡
自古山祇禮赤璋
壇上長流青玉乳
神池高捧帝臺漿

謁禹陵

水土開荒服憂勤
任聖躬八年忘內顧
四載畢前功
歷數虞容及巡游
夏諺同會稽
臨絕徼道里記方中
玉帛諸侯集梯航
萬國通重輝
扶舜日後至
戮防風論德人

無間傳家祚莫終寢園非遠隧祠廟異卑宮祭本天酬
孝民猶俗尚忠穴深藏詭物石立窆神工祕守玄夷使
奇探太史公為魚心感歎酌水意尊崇草莽成臣禮精
靈鑒鄙衷願為松柏樹朝暮護青蔥

東濠雜興

青溪東九西九白鳥朝雙暮雙結屋何殊柳浪投竿別
是桐江

何白四首

白字无咎永嘉布衣有汲古堂集

詩話无咎起於側微事容有之第考萬歷庚辰
履歷龍君御初授徽州府推官鑄級改温州府
學教授入為國子博士未嘗任温州司李也牧
齋尚書殆亦道聽之說汲古堂集原亦出於七
子頗與俞
美長相近

長干客舍同周叔宗夜坐分生字

莊塗輳塵軌未路多所嬰况復歲邁盡懷歸軫予情之
子東高韻神恬物自輕處順鮮有觸居喧若無營偃仰
寄一室展玩忘寢興高梧散縹帙風琴落虛聲欄卑景

先夕墉高曦易傾幽光代明燭寒月暖前楹焚枯命芳
醑歡燕惟平生情披語已洽壘虛時載盈寸襟得所遣
冀此數來并

村翁行

老翁耕種居西邨白頭不到城東門翁言淳朴日非昔
我覺勝兒兒勝孫大孫自託能當戶負租往往凌田主
日斜歸自縣門來桑下乘涼說官府

淮陽歸興

淮泗秋風動地來
月明如水鴈聲哀
南經伍員吹篳市
北眺曹公較弩臺
歸路漸香菰米飯
佳期已負菊花杯
愁聞烽火連東北
極目浮雲黯未開

莫愁湖逢程德懋

莫愁湖邊驚暮春
暖風霽日搖青蘋
柳條繫馬不辭醉
飛絮滿天逢故人

陸弼 六首

弼亦名君弼字無從
江都人歲貢生有正始堂

集

李本寧云無從詩有六朝之靡曼精工有唐宋之舒緩流暢各臻其勝

有鳥

有鳥東南來為巢良已
叨彼鳩胡弗仁一朝奪而居我
躬不遑恤安所念拮据逝將訴
上帝九閭莫可呼鳳皇
三歎息謂鳥亦何愚不聞晉與
魯封土百里餘三桓逐
其君六卿析其都遂使帶礪邦
忽焉為丘墟自古皆有
然勿謂天道迂天定能勝人茲
理若轉樞

韓侯祠

秋風開古廟聞此祀王孫漫說封侯相徒傷過客魂楚歌空激烈淮水易黃昏我亦懷知己漂零未報恩

哭亡弟惟良

早罷諸生籍貧無季子田暮齡看汝健朝露竟余先無復誇聯玉徒令歎逝川山齋姜被在攬處一潸然

哭梅季豹

失意長為客招魂忍向君生難逢醒日死孰問遺文末路淹蓬累他山隔鴈羣蕭蕭桃葉渡團扇掩秋雲

謁于肅愍公墓

荒墳鄰近鄂王宮，異代孤臣伏臘同。
北狩忽聞哀痛詔，中興多仗保釐功。
百年社稷回元氣，五夜松杉起疾風。
聖主祇今恢廟略，飛狐聞已命元戎。

晚泊毘陵諸君攜酒過集舟中

孤城春水浸桃花，白髮逢君酒重賒。
一曲清歌滿船月，不知今夜是天涯。

黃克晦八首

克晦字孔昭惠安人有黃孔昭詩選

沈嘉則云孔昭多深

沉之思本之雄渾發以春容情以景生語必自
鑄字不虛設氣完神定大雅之材朱東器云
孔昭詩意常獨造雖以古入為宗而不蹈襲片
語何思默云孔昭詩如入幽林長薄其樹木
皆世所有而鬱然翳翳祇覺老蒼
歷下瑯琊但稱盧謝未能或先也

詩話孔昭少為畫工壯歲以詩名其金陵游橐
則張仲立刊之西山唱和編則李于美定之金
臺詩則林登卿鐫之登卿稱其古風天籟自鳴
近體森然紀律青溪社集諸公允當推為餘酒

感時

繁霜凋草木谿谷正悽惻玄冥慘不舒改歲固云逼萬

物各有因盛衰迭今昔寧見武安門猶納魏其客

江行

江風來自北弭櫂江水南白浪聒不息游氣昏空潭曠
野何蒼蒼引步隨幽探鹿鳴求其牡豐草非所甘江燕
啄不食念雛聲誦誦物性固如此游子何以堪慨彼江
中水衝波無定端古人忍飢渴旨矣非空談

夢游武當山懷鄖陽江使君

祝融奠朱方五嶽有定目胡不以叅山竝列而為六夜

夢登其巔游氣承我足千峰歷嶮巖如車走平陸上為
帝者居星辰纏其麓崢嶸羽人宮參差徧巖谷中有不
死人終歲茹草木授我鳥迹書奇文不可讀雞鳴忽焉
寤悅歎淚相續

聽話西苑

雷殿清虛太液秋至尊多在望仙樓樹深宮闕東西合
月出東西下上流鱗圓紫芝春曄曄兔園白鹿曉呦呦
軒皇鼎在龍髯斷露箔風簾不上鉤

送何仁仲鴻臚

乍列鵷班黼座前，懷山歸櫂忽悠然。
蘼蕪曉過湘妃廟，葭菼春迷宋玉田。
白雪新聲供奉曲，悲風古調別離篇。
重來何處偏相憶，問我朱陵訪道年。

病中風雨寄歐楨伯

薊門衰病颯驚秋，風雨蕭蕭獨倚樓。
四海新知名下老，頻年多病客中愁。
雲連北極迷宮樹，水發西湖出御溝。
京國逢君歡不淺，可憐經月罷同游。

款乃曲 二首

五虎山如五虎蹲盡對無諸舊國門無諸去後山空在
秋草蕭蕭日又昏

微茫星月下江鄉三十六灣江水長夜半舟人相借問
好風日出到洪塘

鄭琰 二首

琰字翰卿閩縣人 徐興公云翰卿工七言少

詩話翰卿詩名籍甚興致故超七
言近體全得力於唐詩鼓吹者

贈顧小侯

甲第連雲瞰帝城，畫簾繡箔照朱甍。
新開馳道千金埒，舊領團營七較兵。
方士房中龍虎鼎，侍兒花底鳳皇笙。
燕山二月春初好，好玉勒朝朝待曉鶯。

黃山道中

微霜風物色淒淒，路入黃山是五谿。
帝子不歸汾水上，行人愁過穆陵西。
荒原曉露銅駝泣，古驛秋風鐵馬嘶。
獨客傷神家萬里，斜陽征鴈楚天低。

胡宗仁 三首

宗仁字彭舉上元人有知載齋豪

姚園客云胡彭舉如空山

泉落薄晚霞明 顧太初

云彭舉詩奇峭多新致

詩話彭舉詩頗清真惜素為楚人論定必去其菁華僅存皮骨矣

立秋後夜起見明月

深夜見明月漸低西南隅
光華射虛檐照我牀頭書
開函見細字歷歷如貫珠
老眼未能讀惆悵坐庭除
風生梧葉鳴光景殊蕭疎
昨方入秋序清涼便有餘

閒居寄友

家住青溪曲春深花竹迷君來若相問直過西梁西

桃葉渡

桃葉渡頭桃葉春家家姊妹鬪妝新不知何處初來客
未省吳姬解笑人

王嗣經

二首

嗣經字曰常本姓璩上饒人

郊遊

禁樹青郊外重城綠水湄園林春閨月花鳥晝晴時遠
岫平浮檻清泉曲到池晚紅翻蛺蝶新綠坐黃鸝烟斷
游絲見風輕落絮知一陂芳草色禁得馬歸遲

金陵元夕

十二城門徹曉開金壺銀箭不相催行隨燈市家家月
看到花林樹樹梅

王伯稠一首

伯稠字世周崑山人

長干曲

月出江頭白鷺飛
江花采罷濕羅衣
儂家住近長千里
自唱蓮歌伴月歸

鄧欽文一首

欽文字徵父江陰人有倚竹紀游二集

丘念先云山人

摹仿唐賢色澤
音調靡一弗具

洪光寺懷陳更菴

寺裏還藏寺山頭別起山
磴盤千級上僧占一峰閒
秀

色杯前墮孤雲杖底還元龍負奇好惆悵不同攀

程格一首

格字良學休寧人翰林待詔有石林藁

蕪城晚望同方太學元卿賦

木落川原一望開孤城客思轉愁哉帆隨斷靄天邊沒
鳥帶殘陽樹杪來黃葉疎鐘秋寺暝丹楓兩岸暮潮迴
憑高欲擬參軍賦愁絕西風半草萊

汪乾利一首

乾利字和叔歙人

泗上

芒碭山前秋草多彭城王業竟如何雲來還作真人氣
風起猶傳帝子歌朔鴈南飛離紫塞淮流東下接黃河
知君躍馬能乘興一路江山取次過

吳大經一首

大經字元常常熟人有叢桂軒集

江水

霞明江水淨潮落江帆急白鳥趁斜陽銜魚沙渚立

姚悅一首

悅字汝閭秀水人

秋興用杜工部韻

洞庭林屋逕逶迤震澤涼生萬頃陂菰蔣浮沉隄畔米
芙蓉開落澗濱枝琳琅書付靈威守鰕菜船從范蠡移
七十二峰吾歷遍湖天疇識客星垂

錢應晉 三首

應晉字次卿海鹽人萬厯丙子舉人蓬州知州

有閭風館集

九日故城舟中

無處尋籬菊何人送酒來故園知滿徑此地少深杯岸
柳霜前脆雲鴻日暮哀悲秋憐楚客懷抱向誰開

酬金文學

一諾千金重貧交不世情把君書在手感我淚沾纓推
獎期先達泥塗艱此生秋宵相望處但有月同明

過河間憶許長孺侍御

攜手登臺畔存亡憶昔時
酒家仍舊所柳色換新枝
對月杯難覆攀條淚欲滋
風流何處覓逝者竟如斯

徐冽五首

冽字仲容吳縣人萬歷癸卯舉人有嘯碧堂詩

集

踏車曲 三首

阿伴五更來喚儂踏車去
赤日已三商踏車未教住

人言田家樂不知踏車苦憐歡氣力微代歡當卓午
東邊鳳仙花西邊烏桕樹不教儂上車那共歡一處

夜坐對酒 二首

松醪初熟甕生香數盞醺然對夜涼好拂桃笙魂夢穩
月斜桐樹影初長


已許侯封在醉鄉百年須醉萬千場不嫌醉裏疎狂發
自是先生醒更狂

戴 灝 一首

灝字升之嘉興人萬厯丙午舉人

宿僧院

共宿高僧院深杯賦茗柯
鐘聲沉遠樹鴈影度秋河
近海金風早安禪白法多
上方今夜月猶向斷橋過



明詩綜卷六十八